

四庫全書

集部

欽定四庫全書

聖祖仁皇帝御製文第四集卷三十目錄

雜著

康熙幾暇格物編

菓單

普盤

各作泥臘

徐樹

阿濫

金光子

葛仙米

倒弔果

林檎

人中

鼯鼠

地震

欽定四庫全書

聖祖仁皇帝御製文第四集卷三十

雜著

康熙幾暇格物編

菓單

菓單出陝西查本草注云菓單以楸子為之即劉熙釋名所謂柰油也不知楸子所成特黃色一種耳有紅黑二種則以哈菓為之哈菓出肅州及寧夏邊外回子呼

為哈忒今口外亦隨處有之枝幹叢生有柔刺不甚高
大其皮可以飾箭溜矢把耐久倍於桃皮葉似野蒲萄
而小結實攢聚秋深乃熟或赤色或青黑色故俗亦名
紅菓黑菓邊人云秋時採取摘去枝梗將菓下鍋熬出
津液漉去渣滓煉成薄膏貯別器內候少涼膏欲凝結
畧如紙房抄紙法以木為匡抄而成皮勻薄如油紙揭
起陰乾紅菓成者色紅黑菓成者色黑土人以之餉遠
亦名菓煨皮以自熬煨而成也乃哈菓之名書籍皆不

載是知古今方物畧而弗備者何可勝記也

普盤

普盤即木莓一名懸鉤子爾雅所謂蒨也按本草云懸鉤樹生高四五尺其莖白色有倒刺其葉有細齒頗似櫻桃葉而狹長又似地棠花葉四月開小白花結實色紅味酸美人可多食之有以為即覆盆誤也蓋莓有三種藤生緣樹而起者大麥莓乃入藥之覆盆也樹本挺而叢生者木莓一名山莓即普盤也草本委地而生者

地莓亦名蛇莓不可食今江南人謂之蛇盤也

各作泥臘

西洋大紅出阿末里噶彼地有樹樹上有蟲俟蟲自落以布盛於樹下收之成大紅色蟲名各作泥臘考段成式酉陽雜俎有紫鉚出真臘國呼為勒佉亦出彼國使人云是蟻運土於樹端作窠結成紫鉚唐本草蘇恭云紫鉚正如臘蟲研取用之吳錄所謂赤膠亦名紫梗色最紅非中國所有也又考元周達觀真臘風土記云紫

梗蟲名生於一等樹上其樹長丈餘枝條鬱茂葉似橘
經冬而凋上生此蟲正如桑蠶蛸之狀葉凋時蟲亦自
落國人用以假色亦頗難得又唐人張彥遠名畫記云
畫工善其事必利其器研鍊重采用南海之蟻鉚按今
西洋之各作泥臘大小正如蟻腹研淘取色有成大紅
者亦有成真紫者用之設采鮮艷異於中國之紅紫是
即古之紫鉚無疑而北宋以前畫用大紅色至今猶極
鮮潤者實緣此也

楸樹

楓樹南北不同北方原無楓樹之名自南巡見楓樹方知北方之楸木即是楓樹但南方厥木惟喬所以直生北方厥木惟叢故矮短耳其枝葉則相同也

阿濫

阿濫之名見唐詩紀事驪山有小禽名阿濫堆

禽經作鷓鴣鳥

善鳴明皇御玉笛採其聲翻新曲且名焉張祜詩云至今風俗驪山下村笛猶吹阿濫堆通雅云驚驪山鳥也

一名阿溫堆則古名鷖矣

爾雅鷖鷖鷖鷖云鷖一名鷖鷖

亦作鷖溫

讀鷖

安與阿音近

韋昭所謂鷖鳬蘇軾詩不見阿溫堆決起隨衝

風此鳥有二種一種鳳頭者高誘呂覽注所謂鷖一名冠雀是也一種無鳳頭者彙雅所謂阿蘭似百舌而無毛角是也江南人呼為鷖鷖或訛為烏鷖

金光子

金光子閩人呼酸棗樹極高大葉長而尖如橄欖四月開花淺綠色結實如大棗八月始熟色黃故亦名金棗

收乾則紫赤色味酸核圓而堅多竅人心之狀圓外竅中故此果專為心家藥閩書云酸棗出福州建寧福寧建寧人以為糕與櫨糕相似或云其種自西域佛國來取其核就天然罅孔處雕鏤作羅漢形為念珠按政和本草圖經云酸棗真者最不易得其木高數丈徑圍一二尺木理極細堅而且重皮亦細紋似蛇鱗其核仁大而色赤如丹今市之貨者皆棘實耳

葛仙米

葛仙米生湖廣沿溪山穴中石上遇大雨衝開穴口此米隨流而出土人撈取初取時如小鮮木耳紫綠色以醋拌之肥脆可食土人名天仙菜乾則名天仙米亦名葛仙米以水浸之與肉同煮猶作木耳味大約山洞內石髓滴石而成性寒不宜多食聞他府及四川時有之必遇水衝乃得歲不常遇他如深山背陰處大雨之後石上亦間生然形質甚薄見日則化或乾如紙不可食矣又梧州府志葛仙米出北流縣勾漏洞石上為水所

漬而成石耳類也。采得暴乾，仍漬以水，如米狀，以酒泛之。清爽襲人，此原非穀屬，而名為米。俗云：晉葛洪隱此，乏糧，采以為食，故名。嶺南襟記云：韶州仁化縣丹霞山產仙米，徧地所生，粒如粟而色綠，煮熟大如米，其味清腴，大抵南方深山中皆有之也。

倒弔果

倒弔果，俗名弔搭果，形似山梨而小，體微長，味酢，肉多沙，長蒂諸果始生時皆向上，此果花實皆下垂，故名。生

時堅澁熟乃沙性暖利健脾消食樹枝葉俱如梨為秦中物產今遵化沿邊有之而考之書籍草木諸譜皆不載倒吊之名惟司馬相如上林賦云荅還離支荅還音近打拉張揖注云荅還果名按梅堯臣牡丹詩用打拉二字北人方言以欹垂為打拉是荅還名果或因其下垂也說文海篇俱作搭榲果今名吊搭或是荅還音之轉耳

林檎

李類甚繁林檎其一也樹不甚高枝葉皆如李花白唐人謂之月臨花實如李而差小有黃紅二種本草所謂金林檎紅林檎是也獨核有仁味甘津亦名來禽亦名蜜果此果味如蜜能來衆禽於林故得林檎來禽蜜果諸稱學圃餘疏謂花紅即古林檎誤矣花紅柰屬也柰有數種其樹皆疎直葉皆大而厚花帶微紅其實之形色各以種分小而赤者曰柰子大而赤者曰檳子白而點紅或純白圓且大者曰蘋婆果半紅白脆有津者曰

花紅綿而沙者曰沙果西京雜記所以有素柰青柰丹

柰之別也又有海棠果通志謂之海紅而關西有楸子

有楹棹

滿洲呼山楂曰楹棹與陝西同音查梅堯臣有得沙苑楹棹詩政和本草附載楹棹於柰內是

宋時已有此稱其始或從陝西流名關外或從關外通音陝西俱未可定亦皆柰類蓋李之

與柰其枝葉花實固區以別而其子核之異尤最易辨
堅而獨者李類柔小而四五粒者柰類草木諸書皆以
林檎附於柰內其亦未嘗體認物性矣

人中

人之水溝穴在鼻下口上一名人中脉論奇經諸書謂任督二脉一行於身之前一行於身之後會於素膠水溝斷交三穴三穴為面中三水溝又為三之中故名人中也一說人有九竅自鼻以上皆兩自口以下皆一此居其中故云是但釋中之義耳而王遠蠡海集為之說曰所謂人中者天食人以五氣鼻受之地食人以五味口受之人中蓋居人身天地之中也此又未免穿鑿蓋人受天地純全之氣成形四肢百骸能得其全獸則得

其偏如猿猴猩猩之類凡諸禽獸亦似人形而其鼻柱直脣之間總無此水溝一段以此辨人之獨異於獸水溝之所以得人中名也今滿洲呼呢呀爾馬蒙古呼庫門高麗呼薩拉蜜皆直曰人而已可見義理真確自可通之六合竊疑古人氣穴辨論何以未經道此及閱素問骨空篇注有鼻人二字是古人亦祇呼為人矣

鼯鼠

俄羅斯近海北地最寒有地獸焉形似鼠而身大如象

穴地以行見風日即斃其骨亦類象牙白澤柔滑紋無損裂土人每於河濱土中得之以其骨製碗楮梳篦其肉性甚寒食之可除煩熱俄羅斯名摩門索窪華名鼯鼠乃知神異經所云北方層氷之下有大鼠肉重千觔食之已熟字書謂鼯鼠別有一種大於水牛穿地而行見日月之光則死皆即此也

地震

朕臨攬六十年讀書閱事務體驗至理大凡地震皆由

積氣所致程子曰凡地動只是氣動蓋積土之氣不能
純一閼鬱既久其勢不得不奮老子所謂地無以寧恐
將發此地之所以動也陰陽迫而動於下深則震雖微
而所及者廣淺則震雖大而所及者近廣者千里而遙
近者百十里而止適當其始發處甚至落瓦倒垣裂地
敗宇而方幅之內遞以近遠而差其發始於一處旁及
四隅凡在東西南北者皆知其所自也至於湧泉溢水
此皆地中所有隨此氣而出耳既震之後積氣既發斷

無再大震之理而其氣之復歸於脉絡者升降之間猶不能大順必至於安和通適而後反其寧靜之體故大震之後不時有動搖此地氣反元之徵也宋儒謂陽氣鬱而不申逆為往來則地為之震玉歷通政經云陰陽太甚則為地震此皆明於理者西北地方數十年內每有震動而江浙絕無緣大江以南至於荆楚滇黔多大川支水地亦隆窪起伏無數百里平行者其勢欹側下走氣無停行而西北之地彌廣磅礴其氣厚勁坳涌而

又無水澤以舒洩之故易為震也然邊海之地如臺灣
月輒數動者又何也海水力厚而勢平又以積陰之氣
鎮乎土精之上國語所謂陽伏而不能出陰迫而不能
烝於是地震此臺灣之所以常動也謝肇淛五雜俎
云閩廣地常動說者謂濱海水多則地浮夫地豈能浮
於海乎此非通論京房言地震云於水則波今泛海者
遇地動無風而舟自蕩搖舟中人輒能知也地震之由
於積氣其理如此而人鮮有論及者故詳著之

聖祖仁皇帝御製文第四集卷三十

欽定四庫全書

聖祖仁皇帝御製文第四集卷三十一目錄

雜著

康熙幾暇格物編

江源

恒河

浮白

御稻米

食氣

鳥舌

地中有火

禽鳥臍肚之別

賦

時和年豐慶祝賦

并序

欽定四庫全書

聖祖仁皇帝御製文第四集卷三十一

雜著

康熙幾暇格物編

江源

中國水之大而流長者惟河與江其源皆出西番界河之源自元史發明之後人因得知其大畧江之源則從未有能確指其地者酈道元水經注頗言其端委而於

發源之處則云以今所聞殆未濫觴道元亦闕疑而弗
敢定也今三藏之地俱歸版籍山川原委皆可案圖以
稽乃知所謂岷山導江者江水泛濫中國之始禹從此
水而導之江之源實不在是也江源發於科爾坤山之

東南有三泉流出

一自匝巴顏哈拉嶺流出名七七拉
一自匝巴顏哈拉嶺流出名七七拉

麻穆七七拉噶納一自巴顏吐呼母巴顏
哈拉嶺流出名古科克巴哈七七拉噶納合而東南流

土人名岷捏撮岷捏撮者譯言岷江也是為岷江之源
南流至岷納克地名鴉龍江又南流至占對宣撫司會

打冲河入於金沙江東流逕雲南境至四川叙州府與
川江合是真江源根據後人但見打冲河之入金沙金
沙之入川江而又據禹貢東別為沱之文謂川江為岷
江溯流以窮源謂江源必在黃勝關外不知鴉龍江之
上流實為江源也故導江之江有蜀江離江錦江都江
之稱隨地隨時異名而不得專岷江之目者非其源也
宋范成大陸游亦嘗言之范成大吳船錄曰江源自西
戎由岷山澗壑中出而合於都江今書所云止自中國

言耳陸游入蜀記曰嘗登岷山欲窮江源而不可得蓋自蜀郡之西大山廣谷西南走蠻箐中皆岷山也則江所從來遠矣二說皆知黃勝關流入之江非江源而不能定其所在後人反據禹貢文以辨其非漢書地理志謂岷山在湔氐道西徼外江水所出言雖無弊特不知所謂徼外者今科爾坤山之東南耶抑即黃勝關外地也元史云江水出蜀西南徼外東至於岷山而禹導之可謂得其方矣而不能明悉如記河源者蓋河自都實

奉使後始得其源大江濬發之地從無人至者元世祖
南征即從蔥嶺而南直達天竺緬甸由雲貴逕湖廣以
返路在江源之外故不得其詳也然亦有至其地而究
未能辨之者明之宗泐是也宗泐使西域歸云西番抹
必力赤巴山有二水在東北者為河源在東南者為犛
牛河江源也犛牛河即麗江一名金沙江者宗泐但見
是水之先合於金沙江而後合於川江不知金沙江別
源於西番之乳牛山去江源西千餘里乃謂岷江即金

沙誤矣數家之說猶近於影響其餘荒唐散漫更無可採隋經籍志有尋江源一卷其書不傳間見地記有引之者其說云岷江發源於臨洮木塔山臨洮今洮州衛洮河橫亘於南江豈能越洮河而南下耶即有其書必多舛錯亦不足觀已惟明徐弘祖有溯江紀源一篇頗切於形理弘祖曰河入中國歷省五而入海江入中國亦歷省五而入海計其吐納江倍於河按其發源河自崑崙之北江自崑崙之南

按崑崙即科爾坤之訛非真崑崙也

非江源短而河

源長也又云北龍夾河之北南龍抱江之南中龍中界之北龍祇南向半支入中國惟南龍磅礴半宇內其脉亦發於崑崙與金沙江相並南下環滇池以達五嶺龍長則源脉亦長江之所以大於河也至李膺益州記云羊膊嶺水分為二派一東南流為大江一西南流為大渡河元金履祥釋禹貢從之夫大渡河源發於四川大邑縣之霧中山至嘉定州合川江其去岷江真源東西相隔千餘里去禹導江之處南北亦相懸五百餘里

禹貢

導江之處在今黃勝關外乃褚山

而云俱發於羊膊嶺何其謬耶此皆

未得其真惑於載籍以意懸揣而失之也學者孰從而徵之故詳記江源并論列諸家之說於篇

恒河

釋氏之書本自西域其紀山川似乎荒怪然亦頗有依據不可盡非其言小有舛錯者或述之傳聞或譯於筆授轉相記說而訛耳如因本經云阿耨達山頂有阿耨達池池東有恒伽河從象口流出入東海南有辛頭河

從牛口出流入南海西有博叉河從馬口出流入西海
北有斯陀河從師子口出流入北海後人據文疑水從
牛馬師象口出必無之理不知所謂牛馬象師者皆山
之形似也其云入東南西北海則誤矣阿耨達山今之

岡底斯也岡底斯之前有二湖

番名馬品母達
賴湖郎噶湖

即阿耨

達池也其東有山曰馬口

番名打母
朱喀巴珀

有水流東南入

雲南境為檳榔江逕緬甸入南海其南有山曰象口

番名

郎千喀
巴珀

有水流出入二湖而西流其北有山曰師子口

番名僧格
喀巴珀

有水流亦西行與象口之水會而南流其

西有山曰孔雀口

番名馬珀
家喀巴珀

有水流南行與象師口

之水會而東南流為恒河

番名岡噶
母倫江

入南海是經所謂

牛馬師象口者方位或不同至今番人猶稱名之特四

水一分流於東為檳榔江三合流於南為恒河而總入

於南海無分入四海之道耳酈道元水經注引西域記

云阿耨達山有水名遙奴名薩罕名恒伽三水俱入恒

河茲說信然又括地志謂阿耨達山一名崑崙者非也

崑崙去岡底斯西二十度在天竺之極西西印度之北
以北極為天頂故河圖括地象曰崑崙橫為地軸上為
天鎮道經謂天之中嶽水經謂崑崙在地之中皆言在
天地之中也岡底斯去北極偏東二十度其非崑崙明
矣

浮白

浮白二字人但知為飲罰爵之名不知浮白乃人身氣
穴之一素問黃帝問氣穴篇曰目瞳子浮白二穴注云

浮白在耳後入髮際足太陽少陽二脉之會特以古人
未經用過而素問為醫藥之書學者未能旁通故知者
鮮耳若玉樓銀海經蘇軾詩中引用後人皆知玉樓為
肩銀海為目矣

御稻米

豐澤園中有水田數區布玉田穀種歲至九月始刈獲
登場一日循行阡陌時方六月下旬穀穗方穎忽見一
科高出衆稻之上實已堅好因收藏其種待來年驗其

成熟之早否明歲六月時此種果先熟從此生生不已
歲取千百四十餘年以來內膳所進皆此米也其米色
微紅而粒長氣香而味腴以其生自苑田故名御稻米
一歲兩種亦能成兩熟口外種稻至白露以後數天不
能成熟惟此種可以白露前收割故山莊稻田所收每
歲避暑用之尚有贏餘曾頒給其種與江浙督撫織造
令民間種之聞兩省頗有此米惜未廣也南方氣暖其
熟必早於北地當夏秋之交麥禾不接得此早稻利民

非小若更一歲兩種則畝有倍石之收將來蓋藏漸可
充實矣昔宋仁宗聞占城有早熟稻遣使由福建而往
以珍物易其禾種給江淮兩浙即今南方所謂黑穀米
也粒細而性硬又結實甚稀故種者絕少今御稻不待
遠求生於禁苑與古之雀銜天兩者無異朕每飯時嘗
願與天下羣黎共此嘉穀也

食氣

熊於山中必有跼伏之所大抵在巖洞之間人謂之熊

館至冬時入蟄呵氣成冰封其穴口僅留一小孔靜伏於內至春乃出毛詩名物解云熊能引氣故冬蟄不食昔年曾獵得蟄熊驗視腸胃淨潔無物知不食之言信矣倘獵者不即斃之窟中熊逸而去則雖冬月亦必搏獸而食以此悟道家習靜之士能危坐兩三日不食不饑者即食氣內息之道也若與人應對酬酢便不耐饑餓此無他氣隨音而動動則外洩內虛也張紫陽云氣全則生存華佗五禽之戲本於莊周吹呴呼吸吐故納

新熊經鳥伸導引養形之術各有所由來矣

鳥舌

凡鳥舌皆附著下喙有短如粒者有及觜之半者有長與味齊者其短者聲濁而促稍長者聲亦轉長與味齊者其聲圓轉流麗鳴亦能久如黃鸝百舌畫眉阿鸝之屬是也其舌之似人者如鸚鵡了哥松鴉即可委曲其聲以像人語鸛鵒舌似人而有歧故必翦去之而後可學人言然率皆不過數語而止淮南子所謂鸚鵡能言

而不可使長言者得其所言而不得其所以言也此諸
鳥舌皆根於喉而藏於味唯啄木之舌其根通於腦後
其尖逾引逾伸長出於味寸餘樹中蟲蠹雖潛藏穴隙
皆伸其舌鉤取之又有一種蛇頭鳥其頸項甚長其舌
亦如啄木每為鷹鷂擊擒輒伸其舌以刺鷹鷂負痛力
一少縱則逸而逝矣此能以舌為用而不能鳴者以其
舌之太長也元命苞曰舌為言之達人之舌短者言澁
舌長者音不正理亦如是

地中有火

嘗閱陸游老學庵筆記云南鄭見一軍校火山軍人也言火山之南鋤鑿所及烈焰應手涌出故以火山名軍後人疑宋之火山軍為今岢嵐州地但有火山之名而無騰焰之事遂謂其說為妄不知此特地氣有變易耳今黑龍江及蒙古教漢現有地中出火之處去土面一二寸炎光隨起接以引火之物輒傳焰而灼土人耕種時畧耘反之布種其上不兩三月即收穫矣蓋地氣極

熱發生最速故也先儒謂火行分寄於金木水土元命
苞曰火之為言委隨也謂隨物而具也朱子曰金木水
火體質屬土王達謂火實生土而土亦能生火山經所
載令邱騰火諸薄炎山事亦有之無足怪者地志云蜀
川火井隨處而發久者百年或數十年光焰迺息此又
火隨地氣而聚散之一徵也

禽鳥肫肚之別

蠡海集云飛禽為陽皆食果穀走獸為陰皆食芻葉此

言殆未盡然飛禽之中即有食生食穀之異其食生者則有肚如鶴鷯鷩鷯之類是也食穀者則有肫如鷩鷯鷩鷩之類是也集韻云肚胃也肫肚皆鳥之胃以所食而分故凡食生而兼食穀食穀而兼食生者其肫肚與專食穀食生者又各少別至於諸獸如牛羊鹿麋麋之胃則曰脰即肚之旁俗所謂百葉者周禮謂之脾析醢人注云脾析牛百葉也字說曰牛羊等物食生草故有百葉夫牛羊何嘗不食豆菽乎其百葉亦非因食生草

而有大几倒噍之獸皆有百葉爾雅曰牛曰齒羊曰齧
麋鹿曰齧注云齧食之已久復出嚼之也反芻出嚼曰
齧說文云齧者藏之牀中吐而噍也是牛羊麋鹿皆倒
噍故有百葉以類推之可知矣又如熊羆之屬則兼食
生物蔬菜猿猴之屬則專食果穀虎豹之屬則非生物
不食走獸未嘗不食果穀而亦豈皆食芻藁乎昔人謂
鳥獸得氣之偏五臟六腑不能備具辨之甚詳而肫肚
百葉之說獨未有發明之者見其粗而不知其精也惟

人於飲食亦有與臟腑不合者少沾氣味即噦吐反逆
終身不能入口此其腸胃之間亦必有異處靈樞經謂
五臟有大小高下堅脆故飲食嗜好不齊信哉言也

賦

時和年豐慶祝賦

并序

朕誕辰免慶賀行禮者亦多年矣近因六旬羣臣固請
又有恩綸故勉從衆意前一日進宮受賀頒詔往返二
日各省慶祝萬壽設壇誦經不止億兆朕握樞臨極章

句之能素不為務但自幼齡讀書屬文每覽大儒雖不以華麗為尚亦間有作者似取吟詠以托性情因而有感用時和年豐慶祝賦七字為韻賦曰

幸昇平之泰運歷歲月之良時季春移序而大端化俗淑氣氤氲而諸政無為恐德弗類乾惕是規求賢每形乎寤寐治體未致夫昌期同心翊贊是賴多士恭已臨軒憑茲九司主屏虛詎而啟千秋不拔之業臣去私饋而建百世無窮之基此前聖之至理後人所未思也爾

迺揚鑿青野設輦鳴珂大昊斯啟大樂在和衡塗峻闢
雲殿義路廣宣偈歌新花受雨露以爭豔春鳥應載陽
而舞多衆芳芬鬱麗景遮那都人士女轂擊肩摩遠近
縫掖重登制科於是音發簫鼓聲雜管絃百戲盈阡陌
以鬪勝羣黎集岐路而爭先勿驚勿動而民偃如草不
震不騰而朝宗若川結綵繽紛惜傷物力之勞費鋪筵
絡繹止禁珍饈之競妍去奢崇儉力穡祈年此帝王所
當知其然也又迺駢羅羽衛杳渺仙宮金莖玉露福地

空侗論芝田之可種拂珠樹而還童服氣鍊精暖碧臺
之錯落守神凝思叅紫府之穹崇此皆耗精氣於虛廓
廢政事之全功凜黷祀弗欽之旨戒思元蕩志之風若
夫徧列傳燈廣懸法鏡期衆善之並臻興靈祇之協慶
布德延福仰慈蔭於慧雲妙覺能仁渡寶筏於西聖香
風普拂花宮真印潛孚斗柄詳考影形之實恐遺有漏
之行於是明三綱斂五福法天地之無私叶神人之秘
祝養老尊賢重農貴粟含生欣欣長世樸樸祈萬寶之

順成望彼蒼之戡穀願永永其若茲凝休徵於弗祿原
夫泰運升恒乾元下濟謙尊有終恒久勿替先稼穡之
惟艱惠鰥寡之是務陽順叙而不愆陰應期以相附沛
甘澍以咸周扇和風而廣布聞善言於詩書乃予懷之
所慕寫冀望之孔殷爰抽毫而作賦

聖祖仁皇帝御製文第四集卷三十一

欽定四庫全書

聖祖仁皇帝御製文第四集卷三十二目錄

古今體詩二十九首

歲除前二日立春

嘉平月初雪後晚坐偶有所見書懷

詠烏鎗

朕親統六師至寧夏駐蹕二十日遍觀地勢游覽

山形城之東南有巽湖水最清偶爾得野鴨一

隻羽毛滋潤黃頭紫背胸白翅短與他處所有
迥然不同業已忘矣今經十五載忽於畫中又
見此禽因而有感故援筆以記

詠自鳴鐘

賦得禁城春色曉蒼蒼

趙北口水淀作

賦得時人不識予心樂

檣燈

檣燈

調寄點絳脣一名南浦月

五十一年春二月二十四日回鑾遇雨故作春雨
行

閼河長歌

并序

憶詠蘇州風俗

偶觀演劇作

三月初十日恭請

皇太后雅玩齋進膳看梅花

暢春園西新園觀花

西苑試士

大學士陳廷敬輓詩

湯泉應候

將軍潘育龍久任封疆故存問賜詩

賜將軍吳英

冬至讀易

黃臘梅

賦得冬日可愛

詠雪

并序

賦得月照冰池

吏部尚書引年致仕宋瑩因朕六旬壽慶祝來京

事畢五月內回本鄉朕念舊臣特書七言律一

首以紀其事云

賜大學士溫達

幾暇隨筆書懷

欽定四庫全書

聖祖仁皇帝御製文第四集卷三十二

古今體詩二十九首

歲除前二日立春

歲盡星回朔氣消
迎新慵聽奏笙簫
梅花欲報春先到
猶怯凝寒瑞雪飄

嘉平月初雪後晚坐偶有所見書懷

尺雪同雲晴亦佳
心參運水及搬柴
羣鳥將宿頻遷樹

半壁餘光反照堦慷慨行年周甲子徘徊撫景對宮槐
豈辭櫛沐編氓志疾苦先知天下懷

詠鳥鎗

由來火具三皇始後世方興欲廣威未盡響聲先鴈落
已騰煙處帶禽歸海洋掃却鯨魚浪漠北清塵解鐵衣
朕親統六師至寧夏駐蹕二十日遍觀地勢游覽
山形城之東南有巽湖水最清偶爾得野鴨一
隻羽毛滋潤黃頭紫背胸白翅短與他處所有

迴然不同業已忘矣今經十五載忽於畫中又見此禽因而有感故援筆以記

七邊曾歷賀蘭山塞北咽喉最險闕疊翠嵯巒人蹟滅

堆沙道路栢林攀

栢林者非聳然喬木之謂自神木至寧夏積石堆沙之中生栢樹婆娑盤

旋一根至於二三里就地牽攀人馬難走高者不過五六尺粗不過拱把故有栢林攀之句

漢渠遙

轉唐渠會濁水先流清水灣野鳥閒棲猶得靜吾今自

覩二毛斑

詠自鳴鐘

法自西洋始巧心授受知輪行隨刻轉表指按分移絳
帟休催曉金鐘預報時清晨勤政務數問奏章遲

賦得禁城春色曉蒼蒼

淑色瞳矐射早光御園梅柳怯寒霜三宮紫氣通瑤殿
九陌和風到建章春社先農開布種初辛祈穀望書祥
鶯聲燕語添詩思欲去浮文夙夜忙

趙北口水淀作

風微見水綠日暖弄隄妍樹老依根壯心平任物遷維

舟臨草岬揮翰借壺天

此日廟旁借一屋寫字

非是禽魚樂人稠

萬戶烟

賦得時人不識予心樂

恩波遍布首邦畿

此歲地丁俱已蠲免

愛此佳時綠尚微血耗養

衰心益壯神煩物擾體無違暮年筋骨猶能强半世憂
勞幸免非老慣豫遊山水處傍人那得識天機

檣燈

泊舟淺水意如何為惜春光怡興多倚檻晚晴吟皓月

推牕夜靜悅清波
冰消浪潔魚吹沫
風轉雲開鴈踏莎
更有檣燈分掩映
輝煌豈亞扣船歌

檣燈

調寄點絳脣一名南浦月

夜靜更深船牕臨
淀見波影出看何景
燈映牙檣炯

自笑無文難得佳
詞整揮毛穎水平天
永淡露春風冷

五十一年春二月二十四日回鑾遇雨故作春雨

行

春雨難過時春耕不可誤
江南苦多霪河北厭久煦地

濕易蒸雲土鹼能散霧年年常覲此惟祝順陽雨縱然
蒙天眷更欲明三務去歲銀花盈尺餘今看滂沛滿溝
渠兒童應門有喜色農夫奔走百愁舒忙布種治畦蔬
山谷原隰免歉歔四民俯仰皆安業廟堂憂憫當少除
娛目怡心願後樂又慮夏秋苗何如仰冀陰晴無爽忒
方致大有登農書

閼河長歌

并序

朕閱河出郊自南苑過蘆溝順永定河之南岸見十

五年前泥村水鄉捕魚蝦而度生者今起為高屋新
宇種穀黍而有食矣水淀改成沃野溜沙變為美田
因思古人云有治人無治法斯言信哉若治之不早
民至於今未知何似也故有感而作長歌一篇以示
善後之計云爾

春風春社豔陽天雪盡塵清徧路阡曾記當時泊舟處
今成沃土及膏田十年之前汎黃水民生困苦少人烟
歷歷實情親目覩老轉少徙益難撫挾男抱女至馬前

皆云此河不可堵桑乾馬邑雖發源山中諸流數難數
吾想畿內不能防何況遠慮治淮黃數巡高下南北岍
方知渾流為民傷春末無水沙自漲雨多散漫遍汪洋
若非動衆勞人力黎庶無田漸乏食廟謨不惜費帑金
救民每歲受饑溺開河端在辨高低堤岍遠近有準則
未終二年永定成泥沙黃溜直南傾萬姓方蘇愁心解
從此鄉村祝太平昔日宵旰嘗縈慮將來善後勿紛更

憶詠蘇州風俗

鄧尉梅梢月虎邱浪裏峰人爭天地秀物雜理文宗俗
尚非交讓官箴乏協恭輿情常若此何日奏時雍

偶觀演劇作

雅頌不能傳詩詞降作調唐人歌舞精元曲選聲妙若
曰得仙音究未探其要暫為遣見聞寄此發長嘯

三月初十日恭請

皇太后雅玩齋進膳看梅花

當年梅雪伴今歲暮春遲銀杏舒新葉木蘭蓋綠枝花

當亭畔發香逐雨中移別殿陳鮮蜜尚方獻瑞芝老萊
舞膝下珠草列仙墀敬上喬松祝欣瞻王母儀捧觴稱
壽句進酒問安詞地潤鋪紅萼波澄斂玉池高峰多爽
氣綺樹得丰姿漏轉催辰半表行近畫竒承歡同永日
孝思莫違時會慶思經義千秋古訓垂

暢春園西新園觀花

春光盡季月花信露羣芳細草沿階綠竒葩撲戶香寸
陰惜鬢短尺影逐時長心向詩書與精研莫可荒

西苑試士

霽日東風暖平川宇宙寬文章隨世轉經史得人安講
學前賢與觀光後進歡有生宵旰慮獨望和羹難

大學士陳廷敬輓詩

世傳詩賦重名在獨遺榮去歲傷元輔

去歲大學士張玉書故

連

年痛鉅卿朝恩葵志勵國典玉衡平儒雅空興嘆含毫
感倍生

湯泉應候

一為消疾駐靈泉步輦平明觀插田喜見薜華方遍野
更看修竹遠籠烟雖無玩賞因借樂屢慶豐登共息肩
牕外雨聲滴草舍密林鶯語亦欣然

將軍潘育龍久任封疆故存問賜詩

少年勇戰啟元戎久任三秦鐵石衷守土防邇資壯畧
披堅敵陣表彤弓昇平當惜老臣在竹帛還酬舊日功
白首怡神存碩果願期添算荷恩隆

賜將軍吳英

水陸封疆六十年曾經百戰駕輕船蓬臺遠涉鯨鯢浪
島嶼全消烽火烟將老偏宜立志壯宸襟每注施恩延
波濤有作須先靖黽勉防微計未然

冬至讀易

復自純坤起陰陽由靜生飛灰識地氣吹律考中聲六
甲周天運九疇味道精非圖窮理譽本末近分明

黃臘梅

臘後江南得早梅春遲北地見花開不隨岼柳初眠候

祇伴寒松破凍回

賦得冬日可愛

復卦初生處景隨玉管回前旗分鳥道後仗向龍堆愛
日冬偏暖臨橋冰未開寬城行幸地越嶺少塵埃

詠雪

并序

偶出喜雪題衆以舊體擬典故而成朕知目前畢竟
無雪不可為喜故改作詠雪以已意而就非有意於
詞藻也

李秋封地雨寒月減同雲忽見峰頭白那看樹杪霧衆
方矜藻績我獨念耕耘未卜來朝慶田疇積幾分

賦得月照水池

半壁映河隈光瑩鑒瀚洄源清同皎潔溜靜自徘徊遠
照移松嶺寒輝展鏡臺羊腸分岔路飄渺碧雲堆

吏部尚書引年致仕宋犖因朕六旬壽慶祝來京
事畢五月內回本鄉朕念舊臣特書七言律一
首以紀其事云


受祉林泉願養年世家耆德自天全少時劍佩登三殿
久任吳淞撫九阡行儉銓衡有令譽廣平才藻入清篇
修齡喜得人間壽雪作鬚眉興欲仙

賜大學士溫達

自少存心敦孝友中年芳譽晚蘭清樞垣華省看封事
儲粟經邦著政聲三殿絲綸資作楫九霄雨露啟和羹
君臣鬚髮蒼然美時念虞廷進善旌

幾暇隨筆書懷

雲牕欲視遠啟戶北憑觀豈若登山望徒勞譜石看禪
徒空世界仙每誤爐丹何似詩書蘊常圖根本安



聖祖仁皇帝御製文第四集卷三十二

欽定四庫全書

集部

聖祖仁皇帝御製文第四集卷三十一

六

臣 永瑤 恭校

侍讀臣孫球覆勘

覆校官中書臣龔禔身

校對官主簿臣郭祚臧

謄錄監生臣陳際龍

欽定四庫全書

聖祖仁皇帝御製文第四集卷三十三目錄

古今體詩四十九首

五月上旬避暑熱河途中喜麥秋盈野雨暘得時

賦七言一律

夏日山莊二首

金蓮盛放二首

賦得山林引興長

詠夏二首

詠新竹

熱河產人參雖不及遼左枝葉皆同命翰林蔣廷

錫畫圖因戲作七言截句記之

蘭菊圖

蓮花岩松牡丹

嘉禾雙穎

湧翠岩觀瀑賞白蓮

梨樹峪道中步輦口占二首

雲巖

山居即事

覽孝經衍義有感而作

用桮木杯器

春行

去歲八九月雨最多民間俗說封地雨故一冬少
雪猶可支持自來立春復不見雲所以望雨甚

殷昨晚密雲四起夜深甘霖即霑田間老幼無
不舉手加額歡聲載道朕以民食為天喜均一
體故賦七言近體以示羣臣

春行

柳絮

清潭

讀朱子全書有感而作

暑將退

浙閩總督范時崇陛見來京朕每念祖為開創宰
輔父乃忠義名臣所以待之優重今因回任特
書御詩餞送

古北口提督馬進良以年老辭去朕念當日鷹揚
百戰挽強執銳自守紫塞內外恬靜皆因宿將
老成之所致今回林泉深所惜也故賦五言特
記不忘疆場舊事也

賦得萬壑泉消夏千峰翠作秋

大西門升八旗官閣騎射作

江南諸臣

靈泉啓文明

賦得恩光日邊來

五十三年冬至齋戒作

五十三年冬旱十二月初二日大雪二十一日又

雪途中偶成

賦得梅候宮中樹

賦得三十六宮都是春

日月無私能廣運

春日郊行示地方官六首

舟中鼓琴

和風細雨

望湖春色二首

欽定四庫全書

聖祖仁皇帝御製文第四集卷三十三

古今體詩四十九首

五月上旬避暑熱河塗中喜麥秋盈野雨暘得時

賦七言一律

畏暑乘輿出鳳城
麥秋預卜望庾晴
千村共飽連年稔
萬井同歡比屋盈
谷有靈泉山脉壯
道無峻嶺馬蹄輕
移風易俗先忠孝
蕃息編氓在厚生

夏日山莊

日永炎風盛純陰在內含扶陽求物理避暑豈幽探山
靜清歆熱泉潔照碧嵐隨時駐步輦無著亦無貪

其二

畏景消煩慮吟詩續古風野花羅檻外山鳥滿林中雲
氣氤氲合鶯鳴颯爽同無能尋麗句賦物媿難工

金蓮盛放

曾觀貝葉志金蓮再見清涼徧地鮮近日山房栽植茂

參差高下共爭妍

其二

數畝金蓮萬朶黃
凌晨浥露色輝煌
薰風拂檻清波映
併作芙蕖滿院香

賦得山林引興長

曾讀杜詩解紛紛
議論多遇時非泰
運行道至蹉跎托
跡山林趣披懷水石歌
千年賦比興後世豈能過

詠夏

甘泉日永秩南訛清氣重雲入句多性理精研過盛夏
豈因白首廢編摩

其二

信風已盡接朱明長養春容草木亨漱露調冰消暑氣
何如心靜則神清

詠新竹

叢陰半畝潤新篁花氣繽紛伴竹香可愛霏微昨夜雨
簷前風響趣蒼篁

熱河產人參雖不及遼左枝葉皆同命翰林蔣廷錫畫圖因戲作七言截句記之

舊傳補氣為神草近日庸醫誤地精五葉五枝成洛數
順時當用在權衡

蘭菊圖

尺楮繪秋容搜尋墨淡濃丹青偏綽約錦繡雜芊茸意
運含毫手神生應矩胸自分枝向背形影入芳蹤

蓮花岩松牡丹

離宮初雨後花氣滿天街石壁流泉響松坪古幹佳香
凝金掌露名重玉盤釵靜裏經聲息方知道有涯

嘉禾雙穎

夜雨初晴日素商驅暑天林紅變綠葉穀熟卜豐年勿
訝嘉禾瑞須知貴粟先秋成各地異大有再書篇

湧翠岩觀瀑賞白蓮

畢竟天然造化功方能巧設古今同噴雲百尺穿岩石
瀑水千層點藥叢波湧白蓮承曉露溪浮綠蓋動香風

經聲似脫紅塵外
泡影依稀宇宙中

梨樹峪道中步輦口占

入峪橋分三岔路
傍崖步輦景何深
山中獨見松林影
時有清流助鼓琴

其二

一溪展轉見山花
步步石苔楊柳斜
試看目前將熟果
青榛郁李並堪詩

雲巖

三庚不用碧筒酒九井何貪消暑珠自有雲峰來澍雨
巉巖風颯到茅廬

山居即事

清商方至催蟬急林葉吟風暑漸遙三伏炎蒸纔過半
山居徧地喜禾苗

覽孝經衍義有感而作

孝友乾坤蘊彞倫宇宙開無違遵制禮色養勉循陔風
木追前事春秋思表哀懼心從博愛錫類育英才惡慢

須防過驕危誠取灾教原由匪懈德本足蕪該不敬有
何別存誠自可推始終勸興行經義日昭回

用徐木杯器

素輕珠玉器專製及時杯錯節分花影盤根別利才茂
林成木癭深谷染莓苔澹泊明吾志天然見體裁

春行

千紅艷萬紫鮮頻催鬢髻方寸懸桃火柳烟恐蕩志吟
風弄月禁狂顛案牘惟勤被景牽逢春又惡關芳妍禮

樂詩書海岳編進德修業須鑽研曇雲寂滅淪王道老
氏無為徒苟延致知端賴格物先次第由來性理篇性
理無私天地宣太極乾坤未畫前敬承執中授受遠勿
替心傳思永年

去歲八九月雨最多民間俗說封地雨故一冬少
雪猶可支持自交立春復不見雲所以望雨甚
殷昨晚密雲四起夜深甘霖即霑田間老幼無
不舉手加額懽聲載道朕以民食為天喜均一

體故賦七言近體以示羣臣

吟詠由來喜雨多久晴喜雨更如何天心即是民心感
海甸應同畿甸歌立政剛柔符造化體仁寬裕得人和
兩間物理原難盡勿入浮誇曲士科

春行

愛此融融養育多平原高下識恩波雖然迅速春難住
四季何嘗離太和

柳絮

御苑春將盡和風鼓物生芸隄來淑氣丹陛奏清聲眠
柳垂青瑣流鶯轉碧泓沾泥非有意高下點蓬瀛

清潭

一潭清冷拂遊塵活水源頭可問津靜處定知無複浪
動時須認養潛鱗臨流能解薰風意對景先愁滯雨頻
雲影波光相映處湛然澄澈見天真

讀朱子全書有感而作

降衷天命同仁性氣質多偏亦有全人十已千知自勉

參三列九授師傳直方表裏須涵養朝夕云為在惕乾
喻道程朱明盡善正心窮理邇淵淵

暑將退

歎蒸少退解煩憂白髮蒼顏萬里愁觸物方知開造化
閒來更覺有源流倒垂樹影河邊水懸掛波聲岸上樓
分外並無着意處惟將周易靜中求

浙閩總督范時崇陞見來京朕每念祖為開創宰
輔父乃忠義名臣所以待之優重今因回任特

書御詩餞送

翼唐九佐開天命論道三台識國楨握管表章文學館
持忠堅保歲寒名棟梁祖幹家聲重蘭桂孫枝今舉清
浙閩封疆慎撫育惟期寧靜勉精誠

古北口提督馬進良以年老辭去朕念當日鷹揚
百戰挽強執銳自守紫塞內外恬靜皆因宿將
老成之所致今回林泉深所惜也故賦五言特
記不忘疆場舊事也

勇貫先鋒氣鷹揚後陣威秦關提寶劍沙磧歷天旗白
髮秋霜肅丹心皎日輝餞飲軍民別恩崇賜御衣

賦得萬壑泉消夏千峰翠作秋

白藏新素節碧澗洗心泉爽籟鳴楸葉纖雲罩野田鴻
飛橫峻嶺鶴舞愛平川見雨心愁潦聞暘意省愆

開江南旱

西成登瑞穀南畝慶豐年遠近無殊別盈虛有後先
榆懷壯志吟詠借瑤篇生理隨時發淵衷重體乾

大西門升八旗官閱騎射作

騎射為觀德從來舊制存久安惜將老長治厭兵繁訓
練雖成法忠貞實本原先知親上義不必問私恩

江南諸臣

廿載安瀾自有因河干臨幸至於頻白首常思善後策
青疇每念力農晨移風實賴封疆吏化俗無勞專事臣
吳越山川猶在目雖忘多景不忘民

靈泉啟文明

節應黃鐘律陽生復卦前烈風催短鬢暖溜益稀年梅

候宮中樹詩成儿上箋乾坤先後畫至理在精研

賦得恩光日邊來

冬藏待春發良止佐東生八極分仁政諸方拱嚮明車
書同內外民物望豐亨敬奉無私義殷勤宵旰情

五十三年冬至齋戒作

始復生生已渾同不因小往大來中簫韶如在精誠致
鐘鼓云乎禮樂崇日月無私能廣運聖賢有教佐天功
老年豈惜衰殘力強欲躬行盡潔衷

五十三年冬旱十二月初二日大雪二十一日又

雪途中偶成

玉花泱泱近春和步輦平明廻陌過村老憑門吟里曲
行人載道詠寒歌無塵遠視山橫塞破凍齊驅馬渡河
盈尺王畿皆作瑞龍沙惟慮雪霜多

塞外不
宜多雪

賦得梅候宮中樹

積雪梅猶冷春寒竹色沉占年勤遠慮惡酒自高吟憂
樂同民切詩書味道深光風來錦甸生養見天心

賦得三十六宮都是春

四時觀物視韋篇奧旨微言開畫前月窟天根來往處
地雷乾巽互環旋青陽和煦為春首淑日依遲作道筌
運轉洪鈞推造化體元善政在身先

日月無私能廣運

春寒暗解消冰勢膏澍新添助發生繡壤已看隨處潤
柴扉共樂及時耕運籌普被羣黎廣宵旰先思積粟盈
每覽前村童叟悅楓宸少慰白鬚情

春日郊行示地方官

警蹕幸畿南中和慰閭里千村靜路塵淑氣徧遠邇

其二

每春來此地黎庶盡安康尚德先寬政官僚勉直方

其三

春蒐省耕種莫悞農桑時假寐堦墻睹殷勤意在茲

其四

牧民寄所重授鉞賴宣風曩昔官箴在開誠上下同

其五

平成多歷年生齒既蕃庶惟食在天時輕徭民自豫

其六

案讀五經義遐觀四海圖緬懷洙泗訓期共樂天衢

舟中鼓琴

蓬牕聽綠綺月影映船遙靜裏宮商別風前律呂調雁
飛遙集渚魚躍欲乘潮雨歇苔猶濕應知助麥苗

和風細雨

春潭連霖霖沙岫泊輕舟鴨綠苔痕靜人閒載酒遊風
帆通野望雨氣雜清流懷保先農事觀耕鳳蹕留

望湖春色

極目平波心水同烟添媚景日曛曨湖邊淑色年年有
似我澄懷數省躬

其二

倚檻平明對草廬溪濱來往隱樵漁雖然九五乘乾位
山水幽情自卷舒

聖祖仁皇帝御製文第四集卷三十三

欽定四庫全書

聖祖仁皇帝御製文第四集卷三十四目錄

古今體詩三十五首

舟中觀耕種

春歸

南方青竹叢林不乏觀玩北地氣寒非保護得宜
即難藝植朕嘗有事河干往來數次覽竹樹之
暢茂暫時停輦即行後於禁苑種植頗蕃今經

三十餘年邇來延致數畝之廣其圍至八寸徑
二寸五分有零古人以竹比君子因而思及草
木無知積小以至於高大人有血氣加之培養
豈非國家楨幹之選歟故賦七言一律記之
五十四年仲夏避暑途中瑞麥盈野賦五言律以

記

每見村農野老不識不知天然自得孝弟發於至
性樸誠不事文辭故美其實而取先進之意賦

七言一律

擎蓋荷珠

調寄鷓鴣天

雨後戲題回文詩

佛手柑

賦得江城五月落梅花

芝徑雲隄細雨歸舟

題蘭

詠剪秋羅

餞大學士李光地暫回閩省

秋幸出郊見收成志喜五言律二首

賦得帳殿鬱崔嵬二首

康熙五十四年十月初三日避暑山莊恭祝

皇太后萬壽詩

并序

冬日可愛

冬夜偶成二首

餞閩撫陳瓚

李冬湯泉

五十四年除夕偶成

康熙五十五年正月元旦書懷

上元前三日立春

五十五年正月十二癸卯立春是日風從東北而
至景雲密布瑞雪鋪地至十三日未止書云立
春與元日同占乃收成之兆故喜民有足食之
慶朕慰宵旰之憂賦五言排律以記其事

春寒梅遲

湯泉道上遇雪口占

春風扇微和二首

題朱倫瀚手指畫雪梅竹二首

兩廣總督趙宏燦陞見來京

賦得二月春風似剪刀

欽定四庫全書

聖祖仁皇帝御製文第四集卷三十四

古今體詩三十五首

舟中觀耕種

四野春耕阡陌安徐牽密纜望河干土肥原係黃沙過
永定河泛濫之際遍地黃水自治河之後得以耕種辛苦先年挽異瀾

春歸

勿訝春歸速還因冷覺遲煙寒榆莢落雨逐柳黃移惜

景勤經學怡情喜協時惠風雖曰盡長養已相隨

南方青竹叢林不乏觀玩北地氣寒非保護得宜
即難藝植朕嘗有事河干往來數次覽竹樹之
暢茂暫時停輦即行後於禁苑種植頗蕃今經
三十餘年邇來延至數畝之廣其圍至八寸徑
二寸五分有零古人以竹比君子因而思及草
木無知積小以至於高大人有血氣加之培養
豈非國家楨幹之選歟故賦七言一律記之

培養叢篁多歷年竹牕抱節綠雲鮮猗猗玉潤歌君子
濟濟心虛憶俊賢可愛繽紛含宿雨最宜瀟灑動新烟
餘春欲伴寒松住漸晚韶光被景牽

五十四年仲夏避暑途中瑞麥盈野賦五言律以

記

忽送清塵雨題詩吮兔毫青黃接玉粒霰霰佐瓊膏入
野農歌遍緣溪牧笛高蔚林能解愠密草滿亭臯

每見村農野老不識不知天然自得孝弟發於至

性樸誠不事文辭故美其實而取先進之意賦

七言一律

晝夜徬徨利祿間奚如鄙里野人閒詩書不解窮通事
名姓無聞士宦班孔顏樂處簞瓢在孝弟真情稚子關
可笑文章少實據空將浮偽玷青綸

擎蓋荷珠

調寄鷓鴣天

數畝芳塘花未開荷珠清露落莓苔雨涼翡翠搖歌扇
風弄蜻蜓逐水隈乳燕舞曉鶯來炎天還似未春回

葛衣日暮絲絲冷丹檻泉聲處處催

雨後戲題回文詩

雲收曉景霽烟開曲檻香凝露染苔分徑花光清氣爽
紛紛雨思綺文裁

佛手柑

生綠熟黃却有因清香闔嶠共呈珍似開貝葉瞿曇手
妙合華陰仙掌垠異物不須傳驛路奇芬欣得近楓宸
畫圖尺素分枝幹相對無煩憶海濱

賦得江城五月落梅花

梅花一調楚江干
吹徹瀟湘五月寒
地北天南無謫叟
不教羈思入毫端

芝徑雲隄細雨歸舟

長隄一線入芝逕
小艇乘涼隔岼移
水向方橋滌細浪
風吹菡萏倒垂枝
秋成已慶年豐兆
暑盡無憂雲漢詩
遺事陳瓜為七夕
偶因佳節賦清辭

題蘭

君子之道闇然日章蕙蘭之質有風則香草木培植格
物知詳飛潛動靜各有攸藏秉精天地青紫芬芳產自
松島移根草堂

詠剪秋羅

可惜輕羅任剪裁名傳南國向秋開未知紫塞多佳種
雜置嫣紅配綠苔

餞大學士李光地暫回閩省

協恭惟得老成儒味道經書翊廟謨白髮辭君千里去

丹心捧日寸誠敷秋霜昔歲明臣節崑玉冲襟決勝符
暫別恩榮宸翰餞勿勞遠念慰長途

秋幸出郊見收成志喜

節屆商秋早農忙屢歲豐柴門歌再稔比屋樂同風人
煙多慶色霜樹雜微紅極目高低景山川一望中

其二

滌暑高風至中分白露微草肥宜牧馬林薄好行圍水
向堦前注峰排雲外稀斜陽臨帳殿晚色秘天機

賦得帳殿鬱崔嵬

茂林葉未黃賓鴈始成行後隊分山出前旌越嶺揚鹿
鳴秋草盛人喜菊花香日暮帷宮近風高暑氣藏

其二

清露知時轉纖雲却暑回豫遊臨石磴雜蹈過河隈潭
靜魚吹沫林踈鹿印苔秋成良可賦為此共徘徊

康熙五十四年十月初三日避暑山莊恭祝

皇太后萬壽詩

并序

伏以

坤厚直方德配含弘以光大

母儀康健慶來積善之安貞靈芝仙草咸歡比日之休

雪藕冰桃好祝如山之壽同雲未結花雨長存肅

肅蓮華熒熒貝葉虔寫金經取剛柔之不壞恭呈

鄙語願福祉之無疆萬歲千秋乃文章之故套耄

年遐筭實世間之瑞人臣捧霞觴恭祝百歲不揣

無文敬賦長律

誕值小春暖承顏愛日長農閒歌樂土臣喜拜山堂
孟月祈年節芳庖獻壽觴南峰留翠蓋北斗燦珠行
愉色常猶怯怡聲久未忘歡心依

白髮福曜現青方至養

慈闈慶遐齡

母德昌虛文豈作頌人瑞紀篇章

冬日可愛

秋斂冬藏暗發生循環潛應有餘情扶陽布序君人志

愛日書雲宇宙明長至免行丹陛禮融風不設玉厨羹
化醇意切慚涼德漸喜春和萬物榮

冬夜偶成

隆冬何必辟寒犀惟有蒼顏性不迷玉律迴環新故接
釭花夜永卷中題

其二

安危最係在君心待旦殷勤化理尋鶴髮多愁猶警惕
長思時弊若臨深

餞閩撫陳瓚

留犢從來漢史傳，建牙分閩賴官賢。
寬嚴馭吏須交勉，教養宜民務使全。
嶺海屏藩消蜃氣，關山保障息烽烟。
迎年節近新春至，援筆楓宸餞別篇。

季冬湯泉

素雪滿川山未露，霜林盈野日將斜。
祈年正喜逢長至，澡德非同玩物華。
秉燭檢書冬夕永，焚香待旦畫屏遮。
靈泉每助消寒效，總為純陽辨正邪。

五十四年除夕偶成

待曙迎新節辭寒憶舊時風光忽瞬息歲月急星馳少
小勞宵旰中年按古規精力雖云憊衷腸堅不移

康熙五十五年正月元旦書懷

乍回斗柄又芳晨端月元陽萬象新竹葉向風消積雪
梅花除臘報初春彤庭啟節迎祥始邃閣興文起草頻
每繹晦翁真樂處早知天意即生民

上元前三日立春

臘寒猶接上元燈
牕外參差六出凝
媚景新春催玉律
惠風活水破蛟冰
殷勤祈穀寧辭瘁
勉強雕蟲愧未能
九陌人烟多喜色
千門比戶望年登

五十五年正月十二癸卯立春是日風從東北而至
景雲密布瑞雪鋪地至十三日未止書云立春
與元日同占乃收成之兆故喜民有足食之
慶朕慰宵旰之憂賦五言排律以記其事

問夜何嘗歇殷勤六十年歲華催短鬢寸晷惜擔肩豐

歟無推數平成在事先人安為國瑞穀熟是民天慚撫
陶甄治思將法令蠲雲濃春氣早風靜漏聲傳南陌銀
花徧東郊繡壤連管絃喧里巷燈火接山川不為私情
擾寧耽寶饌延祗期民俗厚敢詡治功全禮讓傳家教
詩書戒往愆翠烟籠畎畝泛泛潤桑田

春寒梅遲

化工節候遞推移長養生生雨露垂雪冷梅驚頻吐萼
春遲柳怯未颺絲陽禽北向還應早林雀羣爭若有知

和氣停雲今夕晚走橋明月賦新詞

湯泉道上遇雪口占

種麥田間盼尺盈牧羊沙漠惡飄雲王臣率土分憂樂
莫道天公有不平

春風扇微和

雪消山露背泉暖日暄波蕩滌甘言疾澄清無妄疴
其二

淑氣來春甸和風慰慙農東郊滋土潤雲盡顯諸峰

題朱倫瀚手指畫雪梅竹

指端寫出犯寒梅老幹單枝雪裏培疑是江南春色晚
紅芳遍野點青苔

又

雪覆石林竹時催臘盡梅閒雲飄遠岫長對翠屏開
兩廣總督趙宏燦陞見來京

鎮撫封疆多歷年滇黔百粵凱歸韉當時馬革抒誠切
近日龍光錫慶綿萬里宣風梅嶺表三台擁節桂江邊

優隆主眷酬耆舊芸閣宸章賜綺筵

賦得二月春風似剪刀

春居別墅少人喧煦育深知造化恩
雪淨梅花舒綠萼霜輕柳帶拂朱垣
和風宇宙嚴寒解暖日亭臯物色繁
無欲自然得靜理丹顏已過白鬚存

聖祖仁皇帝御製文第四集卷三十四

欽定四庫全書

聖祖仁皇帝御製文第四集卷三十五目錄

古今體詩三十三首

春日即事

曉發蘆溝

六里橋鐵柱

水村

春水滿四澤

舟中觀獵

仲春聞雁

閱永定河隄

有序

絡緯養至暮春

五十五年三月下旬園中桃杏玉蘭梅花齊放其

中玉蘭茂盛可觀特請

皇太后一閱

去歲三冬有雪至三月間農忙之際二十七日夜

雨竟夕喜而成詠

賦得隴麥

五十五年冬謁

陵作

春幸

風阻駐蹕白洋湖偶成

小滿後偶早途中祈雨四月二十三日甘霖大霑

晚夏偶成

憶揚州天寧寺竹

七月十六日賜九十一歲老和尚

題畫

澤卜尊丹巴胡土克圖老喇嘛上壽

未開新荷

戲題千里眼

賜松江提督趙珀

綠金蓮花

賜老大臣

蘓州巡撫吳存禮

山莊四季

冬至不能全禮

病中偶爾問及工部尚書翰林院掌院學士徐元
夢乃同學舊翰林康熙十六年以前進士再無
一人矣率賦一律以遣悶懷

欽定四庫全書

聖祖仁皇帝御製文第四集卷三十五

古今體詩三十三首

春日即事

最盛芳春育物多
仲陽孳茂野煙和
豈辭宵旰求民隱
益守平成免賦苛
望杏敷耕迎淑氣
瞻蒲勸稼播嘉禾
中疇社鼓聲相應
敷惠元元載路歌

曉發蘆溝

有閨春深淑景遲長橋水泮未流漸徘徊風景思疇昔
千里金隄保舊規

六里橋鐵柱

鎔鑪鑄冶鎮橋西往返行人舊迹迷世遠傳殊誰識得
天南銅柱想應齊

水村

曾記江淮泊萬艘便旋水淀暫春遊雖無浩渺長波壯
亦有清漪錦浪浮日暮帆檣排遠岫風輕簑笠聚芳洲

鄉村不識居官況漫笑朝堂身世憂

春水滿四澤

條風拂春水碧漲繞烟岑梅萼先知暖林梢漸覆陰柳
舒鳴好鳥渚靜習時禽韶景融和處潛窺造化心

舟中觀獵

習戰昆明漢武穿於今江海靖鯨烟常思遠涉堅筋骨
每令平流演獵舩雁陣驚鎗離復合鷗羣畏弩散還連
衰年雖乏挽強力黽勉春蒐以德先

仲春聞雁

漸喜春和踏草行郊原遙聽曙雞鳴
賓鴻欲向銀灣渚社燕方栖靜舍楹
已覺陰消餘雪散爭看陽長早潮生
省耕畿輔先羣吏留憩田間夜不驚

閱永定河隄

有序

康熙四十年永定河告成至今十六載
隄岍堅固並無氾濫去歲山水陡長幾
不能保所以春幸回鑾便道察閱方知
昔年修築有益於民生永保安瀾矣故

賦七言近體以記其事

豫定安瀾在事前每逢雨潦自心牽帑金不惜籌耕種
膏土惟思廣陌阡隄老失防愁剝蝕岝堅常護幸安全
肩輿頻視桃花水滾滾渾波通碧漣

絡緯養至暮春

秋深厭聒耳今得錦囊盛經臘鳴香閣逢春接玉笙物
微宜護惜事渺亦均平造化雖流轉安然比養生

五十五年三月下旬園中桃杏玉蘭梅花齊放其

中玉蘭茂盛可觀特請

皇太后一閱

玉花萬朶祝

慈顏藉奉惟心半日閒閨月春遲添歲永香枝風送待
時還膝前五代承

王母陛下千齡獻壽山乍曉銅龍迎鳳輦霜容天上覩
仙鬟

去歲三冬有雪至三月間農忙之際二十七日夜

雨竟夕喜而成詠

滋麥如酥雨空濛入土膏心同黎庶苦目盼紫壇高
任器已知重安人寧避勞春愁暫且釋點點付揮毫

賦得隴麥

節遲穀雨後田麥始分畦已送花開盡難將春事稽
純陽時序近餘閏化成齊未卜陰晴適先期輯庶黎

五十五年冬謁

陵作

拜奉山

陵汨兩垂提携鞠育賴

仁慈松林轉盛青如許鬢髮勞傷白所宜屈指多年思

慕永深慚暮景遠來遲珠邱玉殿依然覲悲想

音容寸晷移

春幸

載陽節候愛春和賓日中衡社後過東作勤耕勞衆力
西成有獲廣農科官箴先戒闕河固節鉞曾經歲月多

正已清心倡庶吏宣恩莫使政煩苛

風阻駐蹕白洋湖偶成

平波數頃似江聲風阻湖邊一日程可笑當年巡幸遠
依稀吳越列行營

小滿後偶旱塗中祈雨四月二十三日甘霖大霑
夙夜愁懷春夏間天時難信未怡顏平原晚麥纖莖槁
四野新禾旱色殷乍起雲光連巔岫先垂雨脚遍人寰
共沾甘澍敷膏澤民食方知稼穡艱

晚夏偶成

青榛方作粒，郁李漸微紅。
草藥迷香徑，荷花待晚風。
莫愁秋雨近，且望歲時豐。
倚檻頻觀稼，銀鬚一老翁。

憶揚州天寧寺竹

久別金焦十一年，依稀寒暑遞推遷。
此君有意虛心待，歎我徒勞幽思牽。
雁逐西風何處問，雲回北地竟誰傳。
翠筠晚節饒蒼籜，遠寄宸章梵宇前。

七月十六日賜九十一歲老和尚

暑退全消陌上塵
盂蘭大喜見姚秦
臨風洗鉢龍池雨
凝露舒蓮驚嶺春
送節雙輪同夢幻
持心半偈見深淳
循環已識盈虛理
不向山僧更問津

題畫

杖藜端不染輕塵
野趣天然景物新
春水風帆一目盡
孰知逝者太華津

澤卜尊丹巴胡土克圖老喇嘛上壽

想像當年論轉輪
龍沙遙隔十餘春
相知惟有菩提行

得解嘗聞秘密真花雨頻施鋪佛帳貝經每祝上楓宸
睂橫鼻豎長松壽導引衆生善後因

未開新荷

清和將盡未端陽時雨催擎珠點涼不染淤泥看淨植
雖無花氣葉先香

戲題千里眼

欲窮視遠目曠渺有無中體認全憑準遐觀約略同雖
依雙鏡力獨用一瞳功不重西來巧清明本在躬

賜松江提督趙珀

憶昔雲間山水邦，波流清潤抵松江。
春秋久未臨鑾輅，時刻常懷擁節幢。
訓練多方嫻步伐，撫循成俗重敦龐。
建牙好慰軍民望，服衆投醪士氣降。

綠金蓮花

牡丹有綠誠仙品，幻色生香野草中。
數朶乍開凝碧玉，黃花應遜碧花叢。

賜老大臣

舊日講筵剩幾人徒傷老朽並君臣平生壯志衰如許
諸事灰心懶逼真求簡逡巡多恍惚遇煩留滯累精神
年來詞賦荒疎久覓句深慚筆有塵

蘓州巡撫吳存禮

曾記臨吳十二年文風人傑並堪傳予懷常念窮黎困
勉爾勤箴官吏賢

山莊四季

節屆三春勝發生萬彙齊諸花候御輦百穀待村犁

九夏愁腸雨千林葉正肥紙因思避暑端拱計頻違
金風多爽颶清露滴烟浮目睹倉箱滿方知歲有秋
歲暮添霜鬢殷勤宵旰勞地寒盈尺雪還慮北風高

冬至不能全禮

老殘多阻詣

園丘一念精誠或解憂愆過常思

天每鑒衰頽恒覺自難由無心成化無私覆不息流行
不顯求瞻拜

洪鈞斬禮缺書雲顒望太平秋

病中偶爾問及工部尚書翰林院掌院學士徐元
夢乃同學舊翰林康熙十六年以前進士再無
一人矣率賦一律以遣悶懷

七旬彼此對堪憐病裏回思一慨然少小精神皆散盡
老年歲月任推遷常懷舊學窮經史更想餘閒力簡編
詩興不知何處至拈毫又覺韻難全

聖祖仁皇帝御製文第四集卷三十五

欽定四庫全書

聖祖仁皇帝御製文第四集卷三十六目錄

古今體詩三十八首

千叟宴

朕自幼不喜厚味今年登古稀深知粗食軟蔬足
以頤養天和有人進萋蒿苦麻者因而書懷

題新安道上

示平臧將士

六十一年春齋戒書

園中無處無花觸目皆是故作此自嘲

端陽

久旱無雨夙夜徬徨夏至前方得普霑

豐登者朕之獲福歉收者朕之失政出此入彼不能自恕故作近體一律以自遣

避雨聞鐘

同老侍衛

佛桑花

京中報到霖雨普霑

夏至

山莊晚眺

登四面雲山

夏日山莊百花齊放

題山水畫

山中自詠

山居

戲作回文

題畫

早御稻

題畫

輓總督趙弘燮

自笑古稀

立秋在六月

憶陝西二首

月來香

膳酒自述

樹葉扇

惡繁華

書懷

中元日同僧語

喜嶺外水土

六十一年秋出哨

回鑾

欽定四庫全書

聖祖仁皇帝御製文第四集卷三十六

古今體詩三十八首

千叟宴

百里山川積素妍
古稀白髮會瓊筵
還須尚齒勿尊爵
且向長眉拜瑞年
莫訝君臣同健壯
願偕億兆共昌延
萬幾惟我無休暇
七十衰齡未歇肩

朕自幼不喜厚味
今年登古稀深知
粗食軟蔬足

以頤養天和有人進萋蒿苦麻者因而書懷

淡泊生津液清虛樂有餘鬢霜慚薄德神慙恐高譽苦
好山林趣深耽性道書山翁多耄耄粗食並園蔬

題新安道上

滿目平川映遠空身形少健一衰翁社前荷鋤爭春暖
隴畔扶犁趁晚風雨澤深邀天地德耕桑還賴穡人功
京南每出同村叟總得陽和一氣中

示平藏將士

去年藏裏凱歌回丹陛今朝宴賞陪萬里辛勤瞬息過
歡聲載道似春雷

六十一年春齋戒書

性理參天地經書輔國朝勿勞民力盡莫使俗氛囂不
悞農桑事須輕內外徭風高林鳥靜雨足路塵消視察
焉能隱行藏豈可搖桑榆雖景暮松栢後霜凋長養春
容盛寬嚴君德調倦勤應不免對越愧明昭

園中無處無花觸目皆是故作此自嘲

無花無酒亦氤氲
況有清香到處聞
萬紫千紅雖瞬息
古稀吟詠忘辛勤

端陽

春夏連年旱魃災
雖逢今節免流杯
清和幸得甘霖霈
競渡蒲樽覽一回

久旱無雨夙夜徬徨
夏至前方得普霑

喜雨雖云快
豈無久旱由望雲
待旦起問夜數更
愁霹

靂偏稽候

雷遲小滿後方有聲

風霾任作尤西成
登穀後方慰憫

農憂

豐登者朕之獲福歟收者朕之失政出此入彼不能自恕故作近體一律以自遣

喜雨人同我不然
鯁鯁宵旰待豐年
千村時若千村慶
一日恒暘一日愆
率土盈寧難並得
普天恩澤豈蕪全
先憂後樂何能遂
衰景殘齡祇自憐

避雨聞鐘

雨阻端陽湧翠隈
荷香瀑水點新苔
午鐘忽送曇花曲

那得閒心笑幾回

同老侍衛

龐眉經歲月憶昔舊人稀少小兒童戲年高親故違歎
無手足力偏有友朋譏膝下曾孫事怡情待晚暉

佛桑花

木槿層樓號佛桑新移遠道愛芬芳開時先占榴花艷
留日還同菊蕊香

京中報到霖雨普霑

亢陽愁久旱霖雨滿溝渠
條忽枯枝潤須臾卷葉舒
千村勤襁襖萬頃促犂鋤
企望收成後欣看穀賤書

夏至

山莊逢夏至齋戒禁中同
翠渚萍先綠荷池花未紅
葛衣求體便蔬食養心功
偶得因幾暇偷閒碧樹叢

山莊晚眺

島嶼堪圖畫溪橋宛自成
池邊樹影接峰外月華生
衆鳥巢簷穩羣獐伏地平
無知知德化推擴至民情

登四面雲山

雲梯石磴逼巖從倚杖傍觀衆壑同更上一層圖遠望
奈何樹雜與烟籠

夏日山莊百花齊放

咫尺雄關一線牆景風已拂尚芬芳近都愛此清涼地
逢草逢花莫不香

題山水畫

嶺岫嶽崎路渺茫畫工摹寫各舒長雲峰四起添山色

竹樹重陰致夏涼最愛蕭疎隨意筆可稱流動賞心方
依稀岩洞神仙住那得閒情問草堂

山中自詠

一生何事不斟量老至偷閒自可傷倦體每思依石憇
俗情且喜對山忘春容無計尋方便荏苒誰能駐景光
濯足滄浪清水在企思歸詠舞雩傍

山居

迎薰避暑駐山莊四顧重重邱壑長雨後雛鶯歌密樹

風前練雀舞斜廊靜觀得趣無非景佳興涵虛可致涼
烹茗汲泉清意味箇中誰解有真香

戲作迴文

年豐足雨和時穀賤家家展眉專意民安物阜先為德
廣恩施

題畫

敞懷瀟灑馭風仙散慮逍遙不記年名利牽情忙若輩
方知憂樂豈兼全

早御稻

紫芒半頃綠陰陰最愛先時御稻深若使炎方多廣布
可能兩次見秧針

題畫

隔溪隱隱見牕紗幾度呼童問酒家尺幅林巒分遠近
畫工濃淡最堪誇

輓總督趙宏燮

四十餘年撫近京旗民稱善政和平保全終始君恩重

奄逝悲涼衆涕盈不畏刁頑持法紀久司鎖鑰務精明
官方仍在歸泉壤節鉞空懸攬轡情

自笑古稀

月宇啟牕紗身閒興轉賒龐眉臨事暗垂老厭人譁懶
情心惟靜精勤目已花臨池慚手澁無復競龍蛇

立秋在六月

庚伏雖云盡依然六月中歎蒸臨水榭溽暑望金風未
變秋梧色還舒茁茁紅杖藜西顧意數問奏邊功

憶陝西

長安城闕昔曾遊
黃水名山宛在眸
清渭東流流自在
陽關遠去去何休
民稠地險人難化
穀賤年豐信有收
衰老無能再一覽
緬懷西顧愈添愁

其二

秦嶺河西風俗淳
尚餘剛勁氣難馴
寬嚴相濟毋偏執
教養兼施在體仁
官久每聞滋反覆
吏新未曉作陶甄
小詩自覺乏文麗
可盡衷腸對士民

月來香

月色東升候晚明
金風初到吐芳英
忽聞香撲紗帷近
更覺游仙夢轉清

膳酒自述

盈餘休說帝王家
儉樸身先務戒奢
盛饌醇醲應有損
野蔬風味亦堪嘉
罇中旨酒無能飲
案上珍餚勿過加
淡泊寧心和五味
養身得正勝丹砂

樹葉扇

葉綠存生氣香清却暑風輕搖能夏爽巧製見人工

惡繁華

村野無知太古風心依先進是吾衷不須問到繁華樂
願與生民遯受中

書懷

不逮精神老愈愁銀鬚鶴髮更何求艱難世事危心力
履薄臨深豈自由

中元日同僧語

夙夜焦勞白髮盈愁腸一日幾迴縈偷閒暫向山僧話
可掃塵緣愛憎情

喜嶺外水土

露凝肥草淨無塵處處泉源漾碧津食少事多宵旰老
暫偷閒暇養吾身


六十一年秋出哨

歲歲經行處山川照舊時峰巒不改色鬢髮已如絲勝
地清涼適衰年水土宜非因耽逸豫實借憇神思隔嶺

疑園濶聞聲呼鹿隨歸營常早歇撫景自堪怡行伍原
齊脩屏藩任指麾薄來厚往義遠近普恩施

回鑾

獵罷回鑾塞冷時旻天今歲落霜遲園人競帶甘肥脯
田叟爭收高下麋穀賤共知欣有食物多須記守長規
西成盈野倉箱滿闕內依然是所思



聖祖仁皇帝御製文第四集卷三十六